

教育廣播電臺「巷仔口的臺語」錄音文字稿集數別:18

呼應閩語典之俗語:102 少年袂曉想，食老母成樣；293 無日毋知晝，無鬚毋知老。

錄音日期:

預計播放日期:

安住:各位聽眾朋友逐家好，我是安住老師，歡迎收聽教育廣播電臺「巷仔口的臺語」。

阿如:各位聽眾朋友逐家好，我是阿如。歡迎收聽「巷仔口的臺語」。

安住:阿如，俗語講得好，「無日毋知晝，無鬚毋知老」，普通時仔若看著日頭有夠猛，就大概知影中晝到矣，表示一工嘛已經過一半矣，啊若白喙鬚愈來愈濟，就代表你老矣，這句「無日毋知晝，無鬚毋知老」就是教咱愛好好把握時間，共想欲做的代誌緊去完成，若無「一晃過三冬，三晃一世人」，你的一生誠緊就會結束。

阿如:安住老師，是按怎你會遮爾感慨？

安住:煞毋知，人若老，就愛認老，這陣仔定開會、演講，有時講到下晡，規個人就足癆，無像以早遐爾勇，真正是「少年靠營養，食老靠保養」，我看我愛共家己好好補一下。講著少年人佻老歲仔的無仝，以早咱祖先佻將才咧，干焦用日常生活的動作，就會當共人的一生三个重要階段做一下比較，而且形容甲不止仔好，彼就是「因仔人放尿漩過溪，中年人放尿會必叉，老大人放尿滴著鞋」，你看有厲害無？

阿如:哈哈!安住老師，你介紹的俗語天壽厲害。其實這馬的社會環境已經改善，毋才有人講:「人生七十才開始，你才五十算啥物」，你五十桶頭無算老啦。毋過聽你按呢講規棺，敢是今仔日欲來介紹佻老人有關的俗語？

安住:我講頭，你隨知尾，阿如真正有夠巧。咱今仔日就是欲來介紹幾句仔佻老人有關的俗語。老大人歲數較濟，社會經驗豐富，尤其一寡人情世事，個較知影鉅角，親像看咱咧包紅包，就共咱提醒「人情世事陪夠夠，無鼎閣無灶」，提醒咱毋通為著顧面子，紅包包傷大包，若無，到月底就無錢通食飯。年久月深，身軀邊無法度儉寡錢，按呢食老日子會真歹過，這就是「少年袂曉想，食老母成樣」的道理。像這種教示，咱愛謹記在心，若無，你就會「毋聽老人言，食苦在眼前」、「毋聽老人話，你會真狼狽」。

阿如:安住老師，你講的「人情世事陪夠夠，無鼎閣無灶」是教咱交際應酬愛有摀節，莫傷超過，若無就會「少年袂曉想，食老母成樣」，其實因仔會大，大人會老、「人老筋出，樹老根出」，想欲佇年老的時陣，有較好的物質環境、好的名聲，就愛趁少年的時，好好仔拍拚，予人肯定咱的成就。到咱年老著愛寶惜家己的名聲，做一个予人尊敬的人，「少年拚出名，食老惜名聲」就是這種意思。

安住:阿如，講甲誠好。本成有一好就無兩好，有人呵咾老大人有智慧，嘛有人鬥一寡語句來共老大人消遣，押韻閣好聽，念了閣袂跳針。個講:「老大人倚咧就放屁，坐咧就哈唏，倒落咽袂去，見講講過去，隨講隨袂記。」

阿如:啥?按呢共老大人副洗，實在真過分。毋過過分罔過分，安住老師，聽起來閣誠心適呢，敢會使請老師閣念一遍？

安住:「老大人倚咧就放屁，坐咧就哈唏，倒落咽袂去，見講講過去，隨講隨袂記。」時間的關係，咱就先講到遮，歡迎聽眾朋友，明仔載繼續收聽咱「巷仔口的臺語」。再會！

阿如:再會！